

桂平縣志卷二十六

紀政

郵傳

附電報

郵傳古已有之四子書曰速於置郵而傳命舊志云漢法別馬高下爲置傳馳傳乘傳粵西山高水險向無驛馬故公文遞送俱用舖司有急則插羽於封至舖時登記號部以杜留前稽後之弊仍令分管者確察詳報舊志全省額設舖司九百六十五名就各州縣衝僻定名數桂平舖司在城二名南北河共十九名工食銀歲於存留項下給遇閏有加然查南北江下路十六舖向在塘房居住並未設有舖舍而在城及

南北江頭塘每塘發舖兵二名其餘若福山官江及大黃江盤石等塘俱止一名登號遞文隻身難攝乾隆十九年知縣楊大濱詳請每舖添設一名所需工食於外憲庫驛站銀兩酌量給而駱根等塘移令塘兵幫同遞送水路駕塘船以濟其賞罰處文武會查二拾二年奉文裁汰二十八年奉文檄行查議知縣吳志綰請於工食外量給米三升第恐法久弛生誠能留心體卹嚴行核究則一切遞送可無或愆期外有所謂千里馬者號稱捷足額設二名每年工食於歲終赴司庫請給而桂平附府東西兩省南北兩江簡書紛逐添雇差遣從三班支給多至不敷乾隆二十二年胡府憲檄南貴武

三縣於民壯二十名內酌撥一名幫貼桂平工食按解給二十四年三班稟府乞按季派當以免推卸以均勞逸奉批應否按季輪撥抑另增幫費仰桂平縣移會南貴武三縣妥議詳奪會胡憲解組未及議詳

以上俱錄舊志

清光緒年間設立郵局初在城外後移城內登龍街近照郵章定名潯州二等郵政局縣屬繁盛墟塲並有郵政分局其職務在收接函件遞送前途以函件投郵者繳納郵票費後郵局即將郵票粘貼於所寄之物正面或背面上貼票後蓋印發行其貼票分數之多寡定乎其函件之重輕或視乎其寄程之遠近然除粘貼普通郵票外又有雙單掛號等名法

詳郵局章程此不備錄但章程亦時有更改非能曆久不變每局設局長一人郵差若干人以司理郵務局長由郵政總局委充餘由局長雇倩官民寄附一律照章辦理其傳送速率雖不及電報然而勝於鋪遞故自成立之後公私稱便從前千里馬等名目遂廢

潯州電報局光緒十年成立現附設馬家塘李真人廟內其法以號碼譯字用電傳送能以片刻時間將信息轉達數千里外以故情事之利在速達者均以電報爲宜自有電報軍事上甚稱便利但不能寄附有質物件今與郵政相輔而行法亦甚善又大黃江墟亦有電報與郵政設立在潯局既成